

'S Moschdebflkohlmoisle ond dr Wengertschdoar

Septembr isch', zom Hemml schdengd's
A' Flugzeig iberm Wengert
Dia Drauba alabaschrweiß - a' Elschdr hangd em Nedz...
Kanona fir dia Wengertschbadza, Schbridza fir dia Leis
Mascheena doa, Mascheena dort
A' Landschafd - grausig schee'...

Doa sechd's Moschdebflkohlmoisle zom Wengertschdoar
„Woisch', am beschda wär's, dia Leit dia saufed Moschd 's ganz Joar
Denn dia Beem' em Garda, wo i' meine Mugga fang'
Dia hend Ebfl, ganz vrhudzld ond net g'schbridzd - Moschd sei' Dank!

Drom, weil's Drebfle mendr wird, soddsch' dein Wengert fadza lao
Gugg' de' oa', d' Fedra hee ond oi' Fuaß bluaded scho'
Lass se sausa, deine Reba, wann's 'ed anderschd goahd
Wer da Wei' moag, der muaß warda, bis d' Chemie eigoahd.“

Doch dr Wengertschdoar der bluschdrd sich ond schembfd druf los:
„Halt dei Raffl, liadrigs Moisle, du schabsch' de' bloß
Guade Drebfla wered g'soffa von de' g'scheide Leit'
Ond des G'lomb von Moschd des wird bei ons en 'd Kandl g'heid.

Qualided, neie Sorda, Millionag'wenn
Hörsch', i' be' dr erschde Schdoar, wo sich doa auskennd
Gang noa' hoim zu dei'm Bardl, dem dr Ranza schbannd
Wer uf Moschdfirzla baut, Narr, der baud uf Sand.“

Septembr isch' wiadr, dr Hemml schdrahld
Bludonium iberm Wengert
Dr Wengertschdoar hod glei' an Schlag vrdwischd
Ond isch' vrreggd...
Mit Goschaschudz ond Schdrahlahäs'
A' Mensch suachd seine Reba
'S Moisle uf 'em Ebflbom sechd lois:
„Dr MOSCHD soll Leba!“